



DEO OPTIMO MAXIMO
UNI ET TRINO,
VIRGINI DEI-PARÆ, ET S. LUCE,
Orthodoxorum Medicorum Patrono.



QUÆSTIO MEDICA,*
CARDINALITIIS DISPUTATIONIBUS,
*manè discutienda in Scholis Medicorum, die Jovis secundâ mensis
Martii, anno Domini M. DCC. LXXV.*

M. BENJAMINO-LUDOVICO LUCAS DE LAUREMBERT,
Doctore Medico, Præsîde.

An paucis & simplicibus contento atas longior, vita salubrior?

I.

OMNE NOCET NIMIUM, MODICIS EST LONGIUS ÆVUM:
SUMMA CADUNT, DURANT SED MODERATA DIU.



ATURAM si sequeris ducem, vix aberrabis, teste Tullio. Modò
suadet, mox imperat. Suadenti, auscultandum; imperanti, mi-
nimè reluctandum. Quidquid contrâ fit, non impunè fertur. Ca-
veas tamen ne dum ei velis obtemperare, sancitas ab eâdem leges,
imprudens, transilias. Ne te ducat in vitium culpæ fuga, neque de-
cidas in scyllam cupiens vitare charybdim; in omnibus esse modum sapienter

Authore M. ALLLEAUME Decano, anno 1749.

constitutum pulchrè calles. Hunc firmiter qualem decet justum & tenacem propositi virum tene. Natura pueris est contenta; quicquid ejus excessit modum, pendet instabili loco. Necessaria tantum postulat, nec plus ultra. Qui querit multa, mala querit. Cui contingit quod satis est, nihil amplius optet. Hinc nec plus quam par erit cibi potusque assumendum, nec aequo minus. Uterque pari celebrandus necessitate. Reficiat uterque, non sternat. Nutriat, non obruat. Id fiet cum quantum succi nutritii avolaverit, tantumdem fuisse refarcitum, tibi fuerit perspectum. Scias interim id ipsum te affectum esse, si functiones citò, tuto & jucundè, si liberè, si cum constantia quâdam, certa sanitatis & roboris indicia, exerceantur. Rem exemplo juvat illustrare. Quemadmodum enim superficies aquæ oblatas rerum imagines clarè nequit exhibere, si placida non sit ac limpida; sic mens res objectas non potest percipere, sic corpus sua alacriter munia obire nequit, nisi corpus impuris sordium fontibus sit immune.

I I.

VERUM ea est hominis lapsi misera fors, lugenda conditio, ut cum Tragicæ Medæ, meliora quidem videat sapè sapius, probetque, deteriora tamen plerumque sequatur. Si verbis adjicias fidem, sanitate nihil jucundius, nihil præstantius; amissam dolet, restitutam prædicat, ut amatam sibi Vestalem habet, Reginamque præ cæteris colit Penelopem. Quisque deum eam ambitiose querit, nullus ferè invenit. Nec mirum! Quæ parens Natura dedit ad salutem, exitio vertitur; cibis potulentisque non tam utitur, quam abutitur. Blandis voluptatum lenociniis irretiri nos patimur; aspice libidinosum, ut gulæ totus serviendo turgescit, ut cæno volvitur, & amica lutosus, genio indulget suo. Auream verò si negligas mediocritatem, quot mala te undique circumvenient? E contra si ad ea quæ à simplici tenuique victu dimanant commoda, paulisper attendas, quæ & quam ampla omnium bonorum seges te manet? Hæc inter eminet integra sanitas. Est enim ea individua frugalitatis comes, unæ suæ velut sponte fluit ætas longior, salubrior, scilicet sanitas à libero functionum exercitio, hoc ab expedito jugique solidorum cum fluidis commercio; sed amicum illud amborum fœdus non magis elucet, non magis perficitur, quam si ab omni colluvie immune steter corpus, atque vigeat. Felicem illum hominis statum à legitimo rerum non naturalium usu, imprimis verò cibi & potus scaturire nemo nescit. Sit cibus simplex, tenuis; sit similis potus; dicta hæc surgunt commoda. Concoctis nimirum cibus, mutatis, assimilatis, nil remanet noxium, nil superfluum; tum demum calor naturalis, si quid sit, actione vigens perpetua, toto digestionis negotio semel peracto circa id post modum occupatur, unde ejus quod nociturum erat, coctio, & per varia corporis spiracula eliminatio, expulsio.

I I I.

UTILIA selige, fuge noxia, amove superflua; hæc tria sunt sanitatis veluti compendium, in eaque tuendâ arcanorum maximum. Cibus non qui plurimus, sed qui suavissimus, eligatur. Parabile & appositum est quod natura desiderat; ad supervacanea sudatur, ad manum est quod satis est. Quot hominum unus venter exercet? Illi verò apud Medicos cibi potusque utiles

dicuntur, qui nativam solidis *crasim* conciliare, genuinamque fluidis *diathesim* conservare, tueri, fovere valent. His contraria nociva sunt. In genere naturæ inimica sunt superflua, nimis exquisita, vim ejus & robur excedentia. Verbo detrita actuositate vitæ vires nostræ languent, eas laboribus danturnis lapsas restaurare expedit. Præsto sunt alimenta tam boni succi quam indolis. Mox fatiscebat innatum fibris elaterium, illud novis eas alluentibus succis nunc restituitur. Mox peccabat fluidorum motus minutâ horum quantitate, depravatâ simul qualitate, novo succorum nutritiorum incremento nunc rescinduntur. Quid si rigentibus nimium fibris, rigentia nimium addas, nonne erit oleum igni addere? Sic spirituosii liquores, sic acria lædunt maximè. Quid si sic depravaris fluidis, vel pravam adhucdum qualitatem, vel nimiam horum miscendo atque ineptè cumulando concilia turdis, qualitatem procreando, ingeras; erit sævè morbum morbo congerere. Vid'en quanta cautelâ necesse sit in convenienti ciborum administratione? Num à quocumque vivendi modo te fieri sanum existimes? Noli putare; quæ ad optandum sanitatis templum via perducit, facilis admodum; fallax, lubrica ac plurimis aspera deprehenditur. Plures enim videas in ipso sæpè tramite fatalem subire ruinam; isti quod assequi putant, non assequuntur, & miserè pereunt. Insani! in innumeros ferè apoplecticos, vertiginosos, anhelantes, sincopricos, suffocatos, mentem convertè; undè ipsi prima mali labes, nisi à ciborum omnigenum quantitate & qualitate peccantium ingurgitatione vix interruptâ. Eritne quispiam sanæ mentis qui hæc vel audiendo, vel legendo non agnoscat quàm necesse sit ad beatos, tranquillos, nec diris morborum spiculis exagitados dies transigendos, modicè modicis uti?

I V.

TUIS agrestem oculis subijce continuis sese laboribus exercentem: affixum campis, frigora, æstus & externa quæque sustinentem, cibis simplicibus, siccis, duris, tenacibus & pro virium momento tantum utentem, contemplare; ut vasto incedit corpore, duro, constanti, firmo, ut laboris patiens est, ut morbos validos arcere valet. Olli thorax latus, amplus, abdomen gracile & compressum; humeri, brachia, femora, crura, firma, torosa, carnosa, hirsuta, densis setosisque pilis hirta; cutis dura, caro multa; adeps parcior; porro omnia hæc non aliundè scaturire quàm à moderato, nec-non naturæ consentienti alimentorum usu, certissimum est. Istum pariter longæviorum futurum facile existimo. Aliud non inferioris momenti exemplum in Riverio reperitur. Vir nobilis cum ad triginta quinque annos vitam insalubrem vixisset, licet multis remediis usus esset, variis frequenter morbis consiliatus, tandem Medici prudentis consilio solo visu simpliciiori, diætâque tenuiori morbos illos cepit oppugnare, quâ perseverante cibum scilicet & potum sensim imminuendo, obtinuit ut vitam incolumem à morbis liberam atque vegetam fuerit expertus, quam ultra centesimum suæ ætatis annum produxisse legitur. Aperi divinum Hippocratem. Sanitatis inquit studium est non satiari cibis & impigrum esse ad labores. Aliàs: ubi plus cibi quam pro naturâ ingestum est, hic morbum facit: alibi dissimilia & ciborum multitudo seditionem movent. Huc spectat Galeni dictum: majores nostri paucioribus morbis laborabant quia frugalius vivebant. Plurima cibaria si Senecæ credendum, coinquinant, non alunt. E sacris codicibus eruitur edictum illud; ne te effundas super escam, in multis enim cibis erit infirmitas; propter crapulam multi obierunt,

Fred. Hoff.
Observat.
Cic. Arth.
& Rh.

qui autem abstinens est, adjicit vitam. Si à podagrâ ut à creteris morbis liberari cupis, aut pauper sis, aut ut pauper vivas. Vera corporum defecatrix frugalitas, & siccitia quædam paupertas hos & chronicos similes morbos sæpius curat. Silentio non premam exemplum à Domino Hoffmanno allatum. Dives Germanus omni deliciarum genere affluebat; otio, mollitiei deditus erat; ille ut similiter viventibus accidit, sævissimâ adeò correptus fuit arthritide ut torpentia vix membra movere summum ob dolorem poterat, nisi titubanti ambo subcurrerent ministri. Sed corrumpente sensim fortunâ eo usque is penuriz fuit redactus ut non ministris tantum carere, sed vivendi etiam modo summè tenui & parco dura eum atque flecti nescia coegeret necessitas; hinc miserâ pressus solus incedere paulatim cœpit & assuevit, tandem arthritide tali vivendi genere omnino liberatus fuit. An hæc commoda aliundè scaturiunt quàm à simplici & tenui victu?

V.

IGITUR concedas mihi necesse est firmiori sanitate frui eos qui simplicibus & paucis utuntur cibis, adeoque longæviori vitâ præditos. Sed inquires? Dictu hoc magis quam factu facile. An Reges, an Magnates simplicibus & vilibus cibis vesci convenit; an ii quos civilis vitæ status ad magnos sumptus splendidaque trahunt convivia? Respondeo cum Sancto Gregorio III. moralium. Non cibus sed appetitus in vitio est; hinc lautiores cibi persæpè sine culpâ sumuntur si ad temperantiæ modum; abjectioresque non sine reatu conscientie. Hinc vilis nonnumquam bajulus illautum fabarum magma avidè liguriendo gravissimè & peccat & plerumque sibi nocet dum exquisitissimos etiam cibos absque noxâ quilibet edit vir in superiori collocatus civium ordine. Non autem præcipio ut ventri subtrahas alimenta; contumax est, non potest vinci. Sed latet hic dolus & subtilissimus concupiscentiæ laqueus quo sæpè irretimur obtentu necessitatis negotium obumbrans voluptatis. Erycius quidam Philoxenus, insignis belluo, collum gruis, collum tricubitale, ex comico, sibi dari optabat ad sensum voluptatis & gulæ majorem efficiendum. Dices 2^o. plures reperias ad extremum usque senium provectos qui multis cibis quotidie sese ingurgitant. Respondeo. Rara avis in terris. 3^o. Ex Hippocrate largiori diætâ magis utendum ut facilius externa quævis sustineri queant. Fateor; id verò intelligendum relativè tantum ad unius cujusque temperamentum, consuetudinem, ætatem. Enim verò quilibet largius paulo vivere potest, parcè tamen respectivè ad illius exercitiam. Ut constet quam parvo fames extinguitur. Te ipsum numera, metire corpus, stomachum consule. Scies non esse necessarium quod mensuram excedit. Naturæ pauca sufficiunt, luxuriæ nihil. Bonæ igitur valetudinis & longævitatæ quasi quædam mater est frugalitas inimica luxuriosis epulis & aliena nimiz vini abundantiz. Hinc concludimus:

Ergò paucis & simplicibus contento ætas longior, vita salubrior.

Proponebat Parisiis DEODATUS JEANROY, Tullensis, Doctor Medicus Nanceianus, nec-non Saluberrimæ Facult. Medicinæ Parisiensis Baccalaureus, A. R. S. H. 1775, à sextâ ad meridiem.

Typis Quillau, Universitatis & Facultatis Medicinæ Typographi., 1775.